

AUGLÝSING

um breytingar á gjaldskráum hitaveitna.

Samkvæmt 29. gr. orkulaga nr. 58, 29. apríl 1967 hefur ráðuneytið staðfest eftirfarandi breytingar á gjaldskrá Hitaveitu Hafnar og Hitaveitu Seltjarnarness er taki gildi 1. okt. 1989:

Gjaldskrá Hitaveitu Hafnar, nr. 208, 10. apríl 1989. Allir liðir gjaldskrárinnar hækki um	10.0%
Gjaldskrá Hitaveitu Seltjarnarness nr. 231, 5. maí 1989. Allir liðir gjaldskrárinnar hækki um	10.0%

Iðnaðarráðuneytið, 27. september 1989.

F. h. r.

Páll Flygenring.

Guðrún Skúladóttir.

Nr. 455

15. september 1989

REGLUGERÐ

um búfjárhald í Búðahreppi.

1. gr.

Tilgangur reglugerðar þessarar er að hafa stjórn og yfirsýn yfir búfjárhald í Búðahreppi til að koma í veg fyrir að gróðurlendi sé spillt, koma í veg fyrir ágang búfjár á lóðir hreppsþúa og gæta þess að hús fyrir búpening og önnur aðstaða sé þrífaleg og í samræmi við vilja hreppsnefndar á hverjum tíma.

2. gr.

Búfjárhald (nautgripa, hrossa, svína, sauðfjár, geita og alifugla) er bannað í Búðahreppi, nema með leyfi hreppsnefndar Búðahrepps að uppfylltum eftirfarandi skilyrðum:

- a) að búfjáreigendur hafi jafnan fullnægjandi aðstöðu til þess að halda búfé, bæði hvað varðar húsakost og fóður. Þeir skulu gæta þess að fjöldi búfjár sé innan þeirra marka, sem hreppsnefnd hefur tiltekið í leyfi sínu. Forðagæslumenn skulu fylgjast með því að reglur þessar séu haldnar.
- b) að aðbúnaður búfjár og meðferð þess sé jafnan í fyllsta samræmi við ákvæði laga um búfjarrækt og dýravernd. Þá er búfjáreigendum skylt að hlíta hvers konar fyrirmælum um hreinlæti og heilbrigðishætti. Heilbrigðisfulltrúi fylgist með því að reglur þessar séu haldnar.
- c) að búfé sé ávallt í öruggri vörslu búfjáreigenda. Þeir bera fulla bótaábyrgð á öllu því tjóni, sem búfé þeirra kann að valda.
- d) að verði breyting á eignarhaldi búfjár, ber að gera hreppsnefnd grein fyrir því, sem þá ákveður framhald leyfisveitingar.
- e) að árlegt leyfisgjald skv. ákvörðun hreppsnefndar sé greitt í sveitarsjóð. Leyfi þetta getur verið ákveðin upphæð fyrir hvern grip eða fyrir hvert leyfi. Fer það eftir ákvörðun hreppsnefndar hverju sinni.

3. gr.

Sá sem hyggst sækja um leyfi til búfjárhalds skv. 2. gr., skal senda inn umsókn þess efnis til hreppsnefndar. Í skriflegri umsókn komi fram fjöldi búfjár, sem óskað er leyfis fyrir, hvernig skilyrði 2. gr. verða uppfyllt og annað það sem hreppsnefnd kann að óska eftir eða umsækjandi vill koma á framfæri og telur máli skipta.

4. gr.

Telji hreppsnefnd skilyrðum fullnægt fyrir leyfisveitingu, skal hún veita leyfi til búfjárhalds og er heimilt að takmarka það við ákveðinn tíma, fjölda búfjár og/eða ákveðið svæði. Veitt leyfi til búfjárhalds skuldbindur þó ekki Búðahrepp til að sjá leyfishöfum fyrir beitarlandi eða annarri aðstöðu. Leyfi er gefið út á nafn og er ekki framseljanlegt. Sé leyfið veitt til lengri tíma en eins árs skal það uppsegjanlegt með eins árs fyrirvara. Sé leyfi sagt upp skal allt búfé viðkomandi farið úr landi Búðahrepps eigi síðar en 3 mánuðum eftir að uppsögn tekur gildi og má eftir þann tíma selja það á uppboði eða slátra því á kostnað eiganda. Ef leyfishafi brýtur reglur um meðferð búfjár og gætir þess ekki á fullnægjandi hátt má afturkalla leyfið fyrirvaralaust.

5. gr.

Öll lausaganga búfjár er bönnuð í Búðahreppi.

Búfénað sem gengur laus, skal lögreglustjóri láta handsama og taka í sína vörslu.

Ennfremur geta þeir sem verða fyrir ágangi látið handsama ágangsfénað, en þeir skulu skýra lögreglustjóra frá því tafarlaust. Eigendum slíks ágangsfénaðar ber að greiða allan kostnað af handsömun og geymslu fénaðarinnar, sem og allt það tjón sem ágangsfénaður kann að hafa valdið, innan sólarhrings. Eftir þann tíma verður búfénaðurinn seldur á uppboði eða honum lógað.

Eigendur búfjár bera ábyrgð á tjóni því sem búféð kann að valda.

Ákvæði þessarar greinar gilda einnig um búfé í eigu annarra en íbúa Búðahrepps.

6. gr.

Ef maður heldur búfé án heimildar samkvæmt reglugerð þessari, skal lögreglustjóri hlutast til um að það sé tekið úr vörslu hans. Heimilt er að selja það búfé á opinberu uppboði eða slátra því að undangenginni aðvörun.

Þeir sem við gildistöku þessarar reglugerðar eiga eða hafa í umsjá sinni búfé sem fellur undir ákvæði reglugerðarinnar skulu innan 2ja mánaða frá gildistöku hennar, tilkynna búfjárhald sitt og sækja um leyfi fyrir því. Búfénaður sem ekki hefur verið sótt um leyfi fyrir að þeim tíma liðnum, skal tekinn í vörslu lögreglustjóra, boðinn upp eða lógað að undangenginni aðvörun sem eigi hefur verið sinnt.

7. gr.

Brot gegn þessari reglugerð varðar sektum skv. lögum nr. 44/1964. Með mál út af brotum skal farið að hætti opinberra mála.

Reglugerð þessi, sem er samin og samþykkt af hreppsnefnd Búðahrepps, staðfestist hér með samkvæmt 1. gr. laga nr. 44/1964 um búfjárhald í kaupstöðum og kauptúnum, til að öðlast gildi þegar í stað.

Félagsmálaráðuneytið, 15. september 1989.

Jóhanna Sigurðardóttir.

Pórhildur Línal.